

## Ils 21 d'avrel: Sogn Anselm, arzuestg e confessur



Sogn Anselm ei naschiu igl onn 1033 ad Aosta, in marcau dil Piemont en l'Italia. Siu bab veva num Gondulfus e la mumma Ermenberga. Omisdus fuvan nobels e catolics, denton differents el sedepurtar. Pertgei cont Gondulfus fuva fetg sesurdaus al mund, la mumma denton alla pietad, alla devoziun ed alla tema da Diu. Aschiditg che la mumma ei vivida, fuva Anselm tutttavia in bien affon e deva tutta speranza da daventar in grond um e quei muort ils buns talents ch'el veva e muort la particulara devoziun tier Nossadunna. Mo essend la mumma morta ha Anselm entschiet a sepiarder e passar per la via lada dallas vanadads e suandar ils deletgs mundans.

Per turnar sin la via stretga, sco sia mumma veva mussau ha la divina providentscha sesurvü dil fasierli tgau da siu bab, il qual senza saver pertgei, ha pigliau malaveglia encunter siu feigl. El ha talmein travigliau

Anselm che lez ha bandunau sia patria ed ius cun in survitur en Frontscha. Leu eis el setenius si treis onns senza saver tgei resoluziun prender ni en tgei stan ch'el duessi semetter. Cun 18 onns ha il giuven entschiet a studegiar filosofia e teologia sut la disciplina da Lanfrancus, in zun perdert e studegiuau doctur. Di e notg fuva Anselm vid il studi e cun esser semper mo vid il studegiar per vegnir perderts, ha el sefatg en ch'el studegi memia pauc per daventar sogns.

Pia glischaus d'ina speciala glisch divina eis el sedecidiu da buca mo vegnir gronds en la ductrina, mobein era en sontgadat. Cun quella finamira passa el cun 27 onns en la claustra da Bec en la Normandia, nua ch'il renomau Lanfrancus fuva priur ed igl avat Herulinus da gronda observanza.

Cheu ha Anselm retschiet il habit ed igl uorden da sogn Benedetg. El carscheva di per di buca mo els studis, mobein era enten las vertids taluisa ch'el vegneva gleiti tenius per in spiegel da sabientscha e sontgadad. El durmeva zun pauc e magliava ton sco nuot. Quella vivonda ch'el retscheveva, surveva ad el pli per vilentar che per dustar la fom. Duront il di fuva el occupaus culs exerchezis claustrals cun mussar, entruidar, cussegljar e rispunder a damondas da religiun. La notg denton passentava el per gronda part cun urar, meditar e sponder bia larmas pils puccaus, culs quals Diu vegni offendius.

Suenter treis onns veta claustrala ei Anselm daventaus priur da quella claustra. Zacons auters paders pli vegls eran vegni scui che Anselm sco giuven ha giu la precedenza avon ils auters pli vegls. Mo Anselm sco niev priur ha mussau tonta carezia, humilitonza e prudientscha encunter tuts ses confrars che ses inimitgs han pigliau gronda affecziun e carezia per el. El ei vegnius stimaus da tuts ch'el ei unanimamein vegnius eligius per lur avat suenter la mort da Herulinus.

Il sogn ei ditg sedustaus da prender quella prelatura, mo muort il rugar da tuts eis el secuntentaus dad esser lur avat. Anselm ha lu regiü la claustra cun tala veglionza, buontad e

prudientscha che quella ei en cuort temps daventada ina sedia da biars sogns. Sia aulta ductrina e las sclaridas vertids tarlischavan buca mo en claustra, mobein lunsch sur la tiara ora. Entras quei vegneva el veneraus dils uestgs, dils retgs e da papa Gregori VII ed els serecumnadavan a sias oraziuns cun brevs. Diu sez ha cun miraclas vuliu palesar la sontgadat da quei bien avat. Denter auter vegn ei scret ch'in niebel signur da Flandra che veva la malsogna dalla lepra seigi vegnius medegaus immediat suenter haver buiu dall'aua, cun la quala sogn Anselm vevi lavau ils mauns.

Per certas fatschentas da sia claustra ei sogn Anselm serendius en Engeltiara. Igl arzustgiu da Candelberg fuva vacants tras la mort da Lanfrancus ch'era staus siu professor ed arzustg da leu. Ton il retg Wilhelm II sco era il clerus ed ils aults dil reginavel han vuliu Anselm per lur arzustg. Il sogn avat ei ditg sedustaus da retscheiver quella dignitat. Mo per buca far encunter alla veglia da Diu eis el cun larmas vegnius consecraus arzustg da Candelberg igl onn 1093. Denter il disuorden che regeva en Engeltiara fuva era ch'il retg veva tratg la gronda part dallas entradas ecclesiasticas dalla Baselia, dallas claustras e pervendas a sesez e vuleva era ver l'autoritat sco il papa sur da quellas caussas en siu reginavel.

Vulend sogn Anselm metter il retg sin la dretga via cun rugar, avisar ed admonir, ha el tratg sur da sesez grondas e grevas persecuziuns. Il sogn prelat ha zuar buca seschau tementar ed ei sestentaus sin tuttas modas da midar la veta lischada dil clerus e dil pievel secular che stridava Diu senza turpetg e vergugna cun da tuttas sorts puccaus, era carnals. Il retg vegn vilau sigl arzustg e defenda ils paltruns ton sco el po, aschia ch'il prelat saveva buca curreger e turzegiar il schliet. Quei caschunava ad el bia larmas ed era perquei che biars auters prelats fagevan encunter ad el ord spir respect e tema dil retg. Muort la malezia da quei retg ha tut sia pazienza fritgau pauc.

Lura ei Anselm ius en Frontscha e prest sisu a Ruma tiel papa. Leu ha el rugau il papa da saver renunziar agl uffeci d'arzustg. Il papa ha retschert el cun honur e carezia, mo buca vuliu prender dad el quei buordi. Il papa leva salvar el a Ruma en siu palaz el Lateran, mo quella honur fageva ad el pli mal che tut las aviras ch'el veva giu retschert en Engeltiara. Perquei ha il sogn rugau d'astgar ir a Telese, in marcau dil reginavel da Neapel en la claustra da sogn Salvatore. Igl avat da quella claustra fuva staus siu discipel en l'abbazia da Bec. Per cumadeivladad dalla claustra ha sogn Anselm cun ferventa oraziun fatg nescher cheu a Telese ina fontauna ord in grep, la quala vegn aunc oz numnada la fontauna digl uestg da Candelberg.

Sin camond dil papa ei sogn Anselm vegnius clamaus sco assistent sil cussegl da Bari. Cun sia sabientscha e buna faviala ha el perschuadiu ils herets grecs sur digl esser e la vegnida dil sogn Spért che veva caschunau gronda confusiun. Perfin il papa cun auters prelats han stuii dir: Quei ei il sogn Spért che plaidda uss tras la bucca da Anselm. Aunc auters buns survetschs ha sogn Anselm fatg alla sontga Baselia. Da Bari eis el turnaus cul papa a Ruma e da leu serendius a Lion en Frontscha. Denton ei retg Wilhelm II morts e siu successur Heinrich I ha vuliu che arzustg Anselm tuorni en Engeltiara.

Il sogn ei vegnius suenter a quei giavisch, mo ha puspei gudiu pauc ruaus a Candelberg, pertgei il retg vuleva medemamein sco siu antecessur sepatrunar dils beins, dallas entradas e dils dretgs ecclesiastics. Quei saveva e vuleva Anselm buca vertir ed el tuorna l'autra ga a Ruma tier papa Paschalis II. Quel ha ludau sia premura e pazienza e dau la lubientscha da puspei turnar a Lion. En quei exil eis el staus 16 meins cun far da tutas sorts sogns exercicis.

Denton ha Diu tuccau il cor dil retg ch'el ha enconuschiu sias errurs ed ha supplicau igl arzustg da turnar a Candelberg, nua ch'el ei quella ga vegnius retscharts cun honur e legria. Ussa ei igl entir uestgiu vegnius surdaus al sogn cun tuts privilegis e libertads ecclesiasticas. Aschia ei la pazienza sepagada ed igl ei vegniu ruaus e pasch e buna entelgientscha denter ils spirituals e seculars.

Entuorn treis onns ha Anselm saviu governar la Baselia en pasch ed intruidar il plaid da Diu sco bien pastur. Gia duront il temps da persecuziuns e travaglias e che eran ussa sequietadas, veva Anselm entschiet a scriver biars e bials cudischs e tractats da differentas materias. Particularmein ha el schau anavos bialas meditaziuns sur dalla passiun da Jesus Cristus e sur dalla grondezia dalla purschala e mumma Maria che lain percorscher ch'el seigi staus in grond veneratur da Nossadunna.

Sogn Anselm ei staus igl emprem dils docturs che ha publicamein defendiu l'Immaculada Concezziun da Nossadunna, la quala hagi concepiu senza macla da puccau original. Tier la benedida Regina dil tschiel fuva el schi devozius e schi affecziunaus ch'el saveva buca seretener da bargir, cura ch'el plidava davart grondezia, pussonza e privilegis da Maria.

Havend Anselm cun stentas e disgusts regiu 16 onns siu arzustgiu eis el vegnius malsauns e provedius culs sogns Sacraments dils moribunts. La mesjamna sontga digl onn 1109 eis el sevestgiu cun in cilizi e vegnius springius cun tschendra. Cura che la passiun ei vegnida legida eis el spartius ruasseivlamein ed entaus el sogn parvis e quei ils 21 d'avrel en la vegliadetgna da 76 onns.

## Reflexiun

Muort la giustia ei sogn Anselm staus persequitau bunamein sa entira veta. El fuva schizun persequitau e buca beinvegnius gia da siu bab, lu da ses confrars en claustra, dil retg, dils signurs e spirituals, sco era dil pievel en Engeltiara. Mo tgei dultscha consolaziun ha el gudiu sin pugn da mort, cura ch'el ha patertgau vid ils plaids da Jesus: Beai quels che vegnan persequitai per amur dalla giustia, pertgei a quels s'auda il reginavel da tschiel, denton mo sch'els s'unfreschan cun pazienza disgusts e persecuziuns sco sogn Anselm.

Ord la pli pintga caussa saveva Anselm trer ora bials e nizeivels mussaments sco exempel. Vesend el sco tgauns catschavan sin mintga vart e tschinclavan en la lieu ha el detg: Aschia vegn il carstgaun catschaut en anguoschas e tschinclaus en sin pugn da mort dils tgauns infernals che laghegian da pigliar la paupra olma. In'atra ga mirava el tier sco in buob fageva siu spass cun in utschi ch'el veva ligiau vid in fil. Quei utschi mess giun plaun, sesalzava legramein per sgular naven, mo vegneva puspei tratgs neutier dil buob e quei pliras ga. Sogn Anselm di:

Quei representa ils pucconts che per munconza dalla vera penetienza vivan suenter il plascher dil demuni. Cun far enqual confessiun para ei ch'il puccont vegli sesalzar e sgular naven dallas greflas dil demuni. Mo muort munconza da vera dolor e ver propiest e forse era sinceradat dalla confessiun, resta el aunc ligiaus e cavistraus dil giavel pir che mai. Villeg. Ribad.